

ДРУГОЕ ПАСТЫРСКОЕ ПОСЛАНИЕ

ДІОНИСІЯ НЯРАДІЯ

ЕПИСКОПА И АПОСТОЛ. АДМИНИСТРАТОРА.

**О ХРИСТІЯНСКОМЪ
ВЫХОВАНЮ
ВЪ ФАМИЛІИ.**



УЖГОРОДЪ, 1924.

КНИГОПЕЧАТНЯ АКЦ. ТОВ. „УНІО“

Найдорогши въ Христѣ родичи!

„Благодать Вамъ и миръ отъ
Бога Отца нашего и Господа
Исуса Христа“! (Фил. 1, 2).

Отъ часу, коли менѣ намѣстникъ Исуса Христа на землѣ, Папа Пій XI., передалъ про-
вадження и епархіи Пряшовской, каждого дня
думаю на всѣхъ Васъ и препоручаю Васъ всѣхъ
особливо при Службѣ Божой милосердію Бо-
жому. Я бы цѣлымъ сердцемъ хотѣлъ якъ най-
скорше всѣхъ нащивити и всѣмъ проповѣдати
слово Божое. Але понеже того не можу такъ
скоро зробити, то пишу до Васъ то мое другое
посланіе и прошу каждого спомежи Васъ, что-
бы старался достати то мое посланіе и больше
разъ его перечитати в своемъ домѣ передъ
дѣтьми. Дайте ту книжочку и другимъ читати и
много добра изъ ней научитесь.

Подъ конецъ 1922. року обойшолъ емъ
якъ епископъ Маковицу и двѣ парохіи на гра-
ницѣ Угорщины. Въ великомъ постѣ 1923. на-
щивилъ емъ парохіи въ Межилаборскомъ краю,
а въ осени сего истого року посѣтилъ емъ де-
котрѣ парохіи изъ деканату Стропковского, Лом-
тонского, Врановского и др. Видѣлъ емъ много
добра у душахъ моего руського народа, але
бачилъ емъ разомъ и декотры слабши стороны.
Якъ пастырь и духовный лѣкаръ маю отъ са-

мого Бога наданый мнѣ святой обовязокъ, чтобы слабости своихъ вѣрныхъ лѣчити.

И теперь еще передъ моими очами стоите Вы всѣ, мои дороги люди, стары и молоды, въ парохіяхъ, въ котрыхъ я уже былъ. И теперь на Васъ дивлюся душевно, якъ идете черезъ горы и долины, по болоту, по снѣгу, рано и въ ночи передъ свою церковцю, чтобы привитати своего владыку. Вы клякали передъ своимъ владыкою и клячучи'сте принимали апостолское благословеніе и ласки того благословенія. Та ваша жива вѣра, тѣ красны церковны пѣснѣ не разъ, не дваразъ до дна души моей переходили и на очахъ моихъ слезы выкликовали. Въ томъ часѣ приходили менѣ до розуму слова пророка Давида: „Блажѣны людіе, ѿмже Господь Богъ ѿхъ“ (Пс. 143, 15). „Счастливы суть тѣи люди, котры мають Бога за Господа своего“. О, блаженный, сторазъ блаженный той народъ, который находить потѣху и радость въ своей святой вѣрѣ и въ службѣ Божой! Той красный спѣвъ въ церкви тѣ витаня ваши, украшованя церкви и домовъ суть яснымъ доказомъ вашей твердой вѣрности до нашей святой Церкви, въ которой сте роджены и въ которой жадаете жити, умерати. Я знаю, же вы готовы за ту святу греко-каѳолическу вѣру всегда кожду жертву принести, а если бы была потреба, и самое житье свое жертвовати. И добре думаете.

Я и при той нагодѣ дякую Вамъ всѣмъ, добры мои люди, за ту вашу любовь до святой нашей Церкви. Стойте добре въ нашей святой вѣрѣ!

Въ часахъ, коли епископы мають выпивати не разъ горьки чаши, для нихъ нема на томъ

свѣтъ радостнѣйшого отъ того, коли чують, або своими очами видять „же ихъ духовны дѣти ходять по правдѣ“ (III. Іоан. 4.).

„Жатва убо многа, дѣлателей же мало“

Але, найдорогши мои въ Христѣ, мушу от-верто признати, что попри той радости много разъ маю въ души и великій жаль. Тяжко менѣ на души, коли роздумую о томъ, якъ Вы маєте много и премного недостатковъ, коли роздумую о томъ, что „жатва убо многа, а дѣлателей мало“ и у насъ. И хотяй суть наши священники повны жертволюбія и дуже працьовиты, але многи и многи не можуть задля розсіянности своей парохіи, або задля своей старости, або задля другой причины за досить зробити кождой вашой потребѣ духовной. Люди умираючи можуть ще достати святы Тайны, але премноги слабы не можуть въ своей слабости видѣти у себе больше разъ своего священника. Хворы на многихъ мѣстахъ не можуть мати духовной потѣхи святой нашої вѣры особливо въ томъ часѣ, коли того найбільше потребують. Есть уже досить парохій у насъ незаповненихъ задля недостатка священства. По многихъ нашихъ селахъ, отдаленыхъ отъ парохіяльной церкви по 2 и 3 години, выповнюються слова пророка Еремїи: „Младѣнцы просїша хлѣба, ѿ нѣсть ѿмъ разломляющаго“ (4, 4).

Я боюся, дороги мои люди, чтобы ся и у насъ не започало наскоро выполнявати про-роцтво пророка Амося: „Приходятъ дни, каже Господь, коли припущу на землю голодъ, не

голодъ хлѣба ани не жажду воды, *але слуханя словъ Господнихъ...*

И буде свѣтъ бѣгати глядаючи слово Господне и не знайде его“ (8, 11. 12).

Може, кажу, впасти та клятва Божя и на нашъ народъ. А для чого бы та кара могла прійти и на насъ? Для того, бо и у насъ люде дуже мало, або майже ничего не моляться „Господину жатвы, чтобы послалъ работниковъ на жатву свою“. И у насъ трафляються случаѣ, гдѣ вѣрны гонять отъ себе посланныхъ имъ отъ Господа работниковъ Иисусовыхъ. И у насъ вже суть люди, котры омаловажують святое позвание на священническую службу.

И у насъ вже находятся люди, котры забываютъ на слова Спасителя: „Достоинъ есть дѣлатель мзды своей“ и не стараются по некоторыхъ сторонахъ за тѣхъ, котры посвятили житие свое для звышенной службы священнической, службы Божой и спасеня безсмертныхъ душъ; за тѣхъ, котры провадятъ чоловѣка отъ колыски до гроба. О, най премилосердный Господь захоронить рускій народъ отъ сей найстрашнѣйшой кары своей!

Але, уважайте и Вы, мои вѣрны, чтобы 'сте не заслужили таку кару. Не забывайте на кары, якими Господь Богъ посѣтилъ Россію и Украину, а и други край свѣта, гдѣ люди забыли на Бога и на законъ Его. „Дайте Богу, что есть Божое, а слугамъ Его, что имъ припадае“.

Четверта заповѣдь Божя.

Визитуючи епархію видѣлъ емъ и чулъ емъ изъ устъ многихъ родичей жалованя на дѣти.

Чулъ емъ и видѣлъ емъ и слезы старыхъ людей, старыхъ матерей задля непослушности дѣтей. Послушность и почитаніе до родичовъ и старшихъ съ дня на день зменьшуеся и межи руськимъ народомъ. Четверта заповѣдь Божя и у насъ уже за мало уважаеся. Многи руськи дѣти суть зовсѣмъ перепущенѣ сами собѣ и свѣтской погубѣ. По селахъ, на прикладъ, дѣти цѣлыми днями отъ рана до вечера безъ всякого догляду, сами суть на полю, на паши, по домахъ, гдѣ неразъ учаться найстрашнѣйшимъ рѣчамъ отъ старѣшихъ погубленныхъ дѣтей. Многи бѣдны родичи думаютъ, что добре постарались за свою дитину, если ей дадутъ рано до торбы кусникъ хлѣба и пустятъ ю отъ себе на цѣлый день. Ой бѣдны тѣ родичи, а еще бѣднѣйши дѣти, котрѣ намъ приготавливаютъ съ своею опущеностію и погубою найстрашнѣйшу будущность! Священникъ, особливо по горскихъ краяхъ, не може легко достатися до дѣтей, бо тѣ або за далеко отъ него, або онъ мае такъ много работы и други обовязки, что не може поучовати тѣхъ бѣдныхъ дѣтей; або и то бывае, же родичи не хотятъ посылати и пускати дѣтей до священника, бо они больше стараются о добро своего телятка, якъ о добро души своей дитины. Сами знаете, якъ мало маеме своихъ школъ. По декотрыхъ краяхъ ихъ зовсѣмъ нѣтъ. О, какое то духовное несчастье!

Вывованье дѣтей на высшихъ школахъ.

А что еще мушу сказати о родичахъ, котри посылають дѣти свои на высоки школы до мѣста! О сколько есть такихъ родичовъ, котри

не уважають на то, куда дають найдорогше благо свое — дѣтину свою! — Якъ мало есть такихъ, котри добре позвѣдаються, гдѣ суть добри каѳолическіи интернаты, гдѣ добры школы, гдѣ христіянски фамиліи и товариства! Сторазъ мушу подумати, же многимъ родичамъ всьо другое больше важное якъ выхованье ихъ дѣтей. — А такъ дѣти суть найдорогоцѣннѣйшее благо отца и матери. Родичи мають отъ самого Бога данный имъ найсвятѣйшій обовязокъ старатися о духовное добро своихъ дѣтей! Того обовязку не може отъ нихъ забрати жадень чоловікъ, поки они жиють. Христіянски родичи подъ найтяжшимъ грѣхомъ обовязаны старатися о христіянское выхованье своихъ дѣтей! — Отъ сего обовязку нема диспензаціи.

Право дѣтей на доброе выхованье.

Дѣти мають и право на то, чтобы ихъ родичи имъ посвящали наибольшое и першее старанье! — Опущеность дѣтей изъ стороны родичовъ есть наша велика рана и несчастье въ тыхъ тяжкихъ часахъ. Что буде съ нашею будучностію, если молодежь наша не буде по христіянски выхована! — И ту берѣмъ прикладъ отъ другихъ народовъ.

Найдорогши въ Христѣ мои вѣрники! Мое намѣреніе въ сегодочномъ своемъ посланію обернутися до всѣхъ отцовъ и матерей и звернути увагу всѣхъ на сей першій и найважнѣйшій родительскій обовязокъ, чтобы ся на всѣ возможны способы старали:

о вѣрное, христіянское житье и о доброе выхованье своихъ дѣтей.

Кажу: Се першій и найважнѣйшій *обовязокъ родительскій* и тамъ, гдѣ есть душпастырь, и гдѣ есть въ селѣ христіянска школа, а сто-разъ больше тамъ, гдѣ того нема, гдѣ наши люди перепущены на самыхъ себе.

„*Бѣ апостолаы свей фамиліи и скенихъ дѣтей*“! Промовляе св. Іоаннъ Златоустый, родичамъ христіянскимъ. „*Бѣ Отцы, не раздражайте чадъ своихъ, но воспитывайте ихъ въ наказаніи и обученіи Господни*“ (Еф. 6, 4) поминае всѣхъ родителей св. ап. Павелъ.

И для того, горе родичамъ, котры не даютъ своимъ дѣтямъ христіянского вихованя! Сей найсвятѣйшій *обовязокъ* складаю и я нынѣ на душу и сердце всѣмъ нашимъ христіянскимъ родичамъ:

обовязокъ доброго, христіянского вихованя дѣтей у фамиліи.

Сей *обовязокъ* выповнять родичи, если будутъ уважати:

1) чтобы у ихъ фамиліяхъ добре окончовалася кождодневна молитва;

2) если будутъ сами родичи поучовати своихъ дѣтей у христіянской науцѣ, и

3) если будутъ родичи давати своимъ дѣтямъ у всемъ святой и добрый прикладъ.

О сихъ трехъ рѣчахъ маю намѣреніе поговорити въ семъ посланіи. Духъ святой най поблагословить мои слова и просвѣтитъ души всѣхъ читателей, чтобы они то всьо добре порозумѣли и у житю перепроваджовали!

I. Свята молитва у фамиліи.

1. Першій и найважнѣйшій обовязокъ христіанскихъ родичовъ есть: у св. вѣрѣ и по христіански выховати свои дѣти.

Правда, же родичи мають обовязокъ старатися и о добра дочасны, о добра того свѣта и о успѣхъ своихъ дѣтей у школахъ, у ремеслу и т. д. Заповѣдае то имъ наша св. вѣра:

„Ище же кто ѿ скейхъ, паче же ѿ домашнихъ не промышляеъ, кѣры ѿкѣргася єсть и некѣрнаго горшій єсть“. (I. Тім. 5, 8) учить св. Павелъ апостоль.

Але головнѣйшимъ стараньемъ родителей мусить быти: старатися о вѣчномъ спасеніи своихъ дѣтей. Задачею есть родичовъ приготовить дѣти свои для Царства Божого. А Царства Божого не може осягнути чоловікъ, котрый по Тайнѣ св. Крещенія не ступилъ до надприродного житя. По святомъ Крещенію станесе „дѣтина гнѣву“ „дѣтиною Божою“ по словахъ св. Павла: „Богъ богаты сый въ милости, за премногю любовь свою, єюже возлюбилъ насъ. И съцихъ насъ мѣртвыхъ погребшеними, соживилъ Христомъ благодатію єсте спасени“. (Еф. 2, 4, 5) „Богъ, богатый въ милосердію, задля превеликой своей любви, котрою насъ любилъ и насъ, мертвыхъ черезъ грѣхи, оживилъ съ Христомъ: ласкою вы есте“. Ласку освячаючу вливае Господь Богъ до нашей души въ святомъ Крещенію. Съ ласкою тою, котра е фундаментомъ высшого, надприродного житя, вливае Господь Богъ разомъ до души чоловіка и три богословски честноты — вѣру, надѣю и любовь. Задля тыхъ честнотъ душа христіанской дѣтины такъ охотно при-

нимае правды св. Евангел'я, и охотно слушае мудрость небесну.

И якъ дае Господь Богъ каждой дѣтинѣ при рожденю природны способности, котры позднѣйше съ выхованьемъ розвиваются, такъ Богъ дае и при перерожденю въ святомъ Крещеню высши способности и дары, котры треба еще съ большою увагою розвивати и усовершовати. Сердце дѣтины е якъ мягкій воскъ, и до него можешъ легко утиснути и доброе и злое. „Дѣти суть якъ воскъ у вашихъ рукахъ, до котрого можете утиснути яку хочете подобу“ — говорить родичамъ св. Василій. А св. Іоаннъ Зл. поручае родичамъ: „Дѣти ваши суть якъ молоды ростлины, и лишень на Васъ стоитъ, ци тѣмъ ростлины вырастутъ ровно и високо, або криво и до болота“. Задля того треба якъ найскорше до тѣхъ сердець посѣяти всѣ блага христіянскихъ честнотъ и вѣчныхъ правдъ. Мусиме перестигнути той погубленный и злый свѣтъ, котрый лишень о то стараеся, чтобы христіянски дѣти за себе досталъ и за свое поганство.

Николи не забудьте того, дороги родичи, же Ваши дѣти благо и золото, котрое Вамъ Господь Богъ передалъ на хованье, а на котрое Господь Богъ мае много больше права, якъ Вы! О той правдѣ такъ красно говорить славна Мати Макавейка слѣдующими словами своимъ 7 сынамъ; „Я не дала Вамъ духа, душу и житье; и я не покладала узы Ваши, але Сотворитель свѣта“. (2 Мак. 7, 22, 23).

2. Каждая дитина е власностью Бога.

Богъ сотворилъ дѣтину, откупилъ, просвѣтилъ. Богъ зробилъ дѣтину храмомъ Духа Свя-

того и далъ ей право на небо. Ту дѣтину пере-
дае Господь Богъ родичамъ не якъ даякое ба-
выско, але якъ и подобіе свое, якъ найдорого-
цѣннѣйшу рѣчь свою.

Читаеме у Святомъ Письмѣ слѣдующое: Донь-
ка Фараонова знайшла у Нилу малу дитину —
Мойсея, выняла дѣтину изъ воды и передаючи
дѣтину женѣ такъ говорила: „Соблюди ми отроча
сіе и воздай ми е: азъ же дамъ ти мзду“. —
И Господь Богъ подобно говоритъ людямъ, коли
имъ дае дѣтя. Говорить имъ голосомъ ихъ со-
вѣсти, а еще яснѣйше словами Святого Писанія
и на уста Св. Церкви: Берѣть ту дѣтину, пере-
хранѣте ю и выховайте ю *для мене и по моей*
волѣ, чтобы зостала на вѣки счастлива! Якъ вы-
полните той свой обовязокъ, такъ будете разъ
отъ мене нагороджены або покараны.

Послухайте родичи: Вамъ дѣти отъ Госпо-
да лишень переданы, — вы будете мусѣти разъ
здавати точный рахунокъ за ихъ души. Задля
того мусите добре уважати на свои дѣти, что-
бысте ихъ допровадили до Бога, и чтобы они
жили житьемъ честноты и побожно. Если хо-
чете мати доброго успѣху, мусите рано запо-
чати съ христіянскимъ выхованіемъ.

Яка радость за отца и матѣрь, коли пер-
шій разъ почують слово съ устъ дѣтины своей:
няньку! мамко! И отецъ и мати забываютъ въ
той часъ на всѣ труды и стараня за свои дѣти.

Отцы и матери! Нѣколи не забудьте на то,
же ваша дѣтина мае еще одного отца *на небесѣхъ*;
мае Отца, которого найсвятѣйшее Имя мусить
славити и съ дѣтинячою любовію призывати!
Въ Святомъ Писанію стоитъ написано: „Изъ
устъ младенецъ и ссущихъ совершилъ еси хвалу“

Поучуйте и научуйте свои дѣти заразъ съ початку вымовляти имя *Исусъ*, имя нашего Спасителя, котрому най буде честь и слава на вѣки!

Учѣть дѣти свои зарана святой молитвы, бо молитва то языкъ, котрымъ душа розмовляє съ Богомъ. Молитва е фундаментъ и першій степень правого христіянского вихованя. Безъ молитвы дуже скоро падае и пропадае кождое вихованье. Памятайте добре! Дѣтина многоразъ забывае всѣ молитвы, что ихъ научилася у школъ, коли выйде до свѣта, але нѣколи не забывае той молитвы, котру мовила у дому якъ мала дѣтина разомъ съ родичами. — Что дѣтина приняла такъ сказати съ молокомъ материнскимъ, то оставае, то жие, то е саме житье. И тѣлько разъ вже молитва, котру мати научила дитину, спасла ей житье вѣчное.

Запроваджуйте таже, дороги родичи, мало по малу дѣти свои до христіянского житя! — Най мати бере слабу ручку своей дѣтины и научить ю перехреститися, а при томъ най побожно вымовляє имя Пресвятой Тройцы: Бога Отца † Сына † и Святого † Духа. — Мало по малу дитина порозумѣе, же той знакъ мае глибоке значѣнье, и же то силное небесное орудіе, котрымъ христіанинъ борониться отъ всѣхъ вороговъ своего вѣчного щастя.

Позднѣйше най мати розтолкуе своей дѣтинѣ головнѣ Тайны, котрѣ находятся въ томъ святомъ знаку:

1. Еденъ Богъ — три пальци *разомъ*;
2. Три особы у Богу — *три пальци*;
3. Ісусъ Христось есть Богъ и чоловікъ два *дольны пальци разомъ*;
4. робиме на собѣ знакъ святого Креста

бо на святомъ Крестѣ насъ Іисусъ Христосъ откупилъ.

То что мати може засадити до сердца дѣтины, того нѣкто другій не годенъ такъ зробити.

3. *Спольна (обща) молитва у фамиліи.*

Съ цѣлымъ сердцемъ прошу и благаю всѣхъ родичовъ, чтобысте у своихъ домахъ *всѣ разомъ съ дѣтьми молилися.*

Молѣться, дороги мой родичи, съ дѣтьми разомъ передъ обѣдомъ и по обѣдѣ, передъ вечерею и по вечери, а особливо вечеръ передъ спаньемъ. — А для чого я то жадаю отъ Васъ? Для того, бо спольна молитва есть чиномъ найкрасшого богослуженя у фамиліи, есть наймоцнѣйшее орудіе христіанского вихованя дѣтей.

Св. Петро называе всѣхъ христіановъ „священствомъ святымъ, царскимъ, чтобы приносили духовни жертвы Богу милу по Іисусу Христу“. (І. Петр. 2, 5. 9.) Если такъ рѣчь маеся съ всѣми христіанами, то сколько больше то имя заслугуютъ родичи христіански — а особливо *фамиліи священническіи!* Фамилія христіанска есть подобна храму Божому, въ котромъ отецъ заступае священника. Онъ збирае всѣ молитвы, бажаня, и святы чувства своихъ дѣтей, соединяе ихъ съ своими молитвами, съ своими жертвами, и жертвуетъ то все на олтарѣ своего сердца Господу Богу. — Ци може быти на семъ свѣтѣ чтось красшого, якъ спольна молитва вечеръ або рано у одной христіанской фамиліи! Ту дѣти позбералися коло своихъ родичовъ. Коло нихъ може быти знайдется еще старый дѣдъ и баба. Тии вже добре знаютъ кресты того свѣта. Всѣ

разомъ покліякали передъ Распятіемъ, або передъ образомъ Сердца Іисуса Христа, або Матери Божой. Всѣ побожно поскладали руки. Всѣмъ изъ устъ и души пробиваеся молитва: „**Отче нашъ, ѿже єси на небесѣхъ**“

Всѣ разомъ просятъ Отца Небесного и посвячаютъ ему свои сердца и свои гадки. Отъ него просятъ помочь у зношенію крестовъ, просятъ потѣху въ жалости, защиту противъ гибели души або тѣла.

О якъ мила молитва Богу тѣхъ малыхъ невинныхъ дѣтей! Съ ихъ очей пробиваеся чистота ихъ души. Съ тѣхъ очей пробиваеся надземна красота. — О христіянски родичи! Молѣться, молѣться разомъ съ своими дѣтьми! Они невинны и чисты, они може еще у хрестной святой невинности. Борьба и порохъ того свѣта еще не запорошили ихъ сердца. — Ихъ души двигаются до неба передъ престолъ Божій, якъ Ангелы Божіи. Если тѣ дѣти просятъ отъ Господа Бога благословеніе за вашу працю, помочь у вашихъ крестахъ, потѣху у жалости, Богъ мусить выслухати ихъ молитвы. Бо *„Очи Господни звернени на праведника и умы его на молитву ихъ“*. „Воззваша праведніи и Господь услыша ихъ и отъ всѣхъ скорбей ихъ избави ихъ.“ (Пс. 33, 16. 18.). — На другомъ мѣстѣ такъ говоритъ Духъ Святый на уста Пророка Давида: „Се очи Господни надъ боячимися Его и надъ тими, котры надѣются на милосердіе Его, чтобы выбавити души ихъ отъ смерти и живити ихъ въ часъ голоду“. (Пс. 32, 18, 19.)

4. О что треба вечеръ просити Господа?

Передъ вечернимъ починкомъ всѣ въ домѣ по найперше дякують Господу Богу въ смиренной молитвѣ за всѣ добра и ласки черезъ день приняты. Препоручають святу Церковь, священниковъ, богослововъ, и всѣ потребности епархіи ласцѣ Божой. Потомъ споминають своихъ усопшихъ и молятся Господу за нихъ и за всѣ души, котри еще терпятъ въ чистилищи.

Дуже а дуже всѣмъ препоручаю, чтобы каждого вечера, каждый еще окремо молился за свои властны потребности.

Коли'сте уже закончили каждодневнѣ свои вечернѣ молитвы, най еще каждый изъ Васъ душею взнесся до неба передъ Божій престолъ и вже не на голосъ, не изъ книжки, але изъ щирого сердца най еще скаже одну коротеньку молитву за свои власны потребности.

А хочешь знати, о что просити, что Іисусу маешь сказати? Запитай себе самого, яка для тебе справа найважнѣйша? Что найбільше тобѣ на сердцѣ лежить, чого тобѣ найбільше потреба, и то съ сердца Христу скажи такъ, якъ тобѣ сердце каже н. пр. такое: „Іисусе Христе, твоему доброму любячому Серцю поручаю таку мою потребу, таку справу; або дай менѣ таку и таку ласку.“

Ты, молодче, маешь ити до войска. Хвиля се важна для тебе. Въ тыхъ рокахъ можешь виробитися и не одного научиться, але можешь и зопсутися; можешь вернутися до хаты горшимъ, як ты скорше былъ, та черезъ то можешь змарновати и цѣлу свою долю.

Въ войску треба большой ласки, якъ въ хатѣ у родичовъ. Тамъ тяжки обовязки и не одно небезпеченство. Тамъ треба особливо отъ злой компаніи вароватися, якъ кто хоче остеречися злого, грѣха. Кто даеся каждому вѣтрови повѣвати, той дуже легко у войску зопсуеся, змарнуеся.

На такую важную хвилю треба собѣ великой ласки Божой выпросити. На передѣ треба уже о томъ памятити. Пойдешъ въ осени до войска, треба уже передѣ великодными святыми сю справу, сю потребу свого житя поручати Божественному Сердцю Спасителя, и певно на добре выйдешъ.

А ты знова, кто вернув'есь изъ войска, думаешь подружитися. Якажъ то важна для тебе хвиля! Если зачнешъ житье родинное съ Богомъ, Богъ поблагословитъ Тебе и Твою родину. А не дай Боже, зачнешъ ли житье родинное съ грѣхомъ, стягнешъ на себе, на жѣнку и дѣти не благословеніе але проклятво Божое. Тожъ напередѣ, закимъ рѣшишь ся, закимъ что зробишь, горячо молися, и всю справу твоего житя чтоденною молитвою поручай Христовому Сердцю.

А ты, дѣвчино, что въ коротцѣ маешь ставати подѣ вѣнокъ, добре впередѣ молися, проси о помочь, о благословеніе Божое, поручай сю справу Божественному Сердцю Христову, отъ которого такъ премного въ твоёмъ житю залежить.

А и Вы, родичи, котрѣ думаете сына ожени, подружити доню, шукайте въ той справѣ помочи у Іисуса Христа. Сохрани Боже, чтобы Вы въ той справѣ супружества вашихъ дѣтей мали ихъ силовати до того, до чого щирою волѣ не мають. — *Тяжкій грѣхъ той робить, хто силуе до супружества, а и дѣти грѣшати, если не скажутъ передѣ отцемъ духовнымъ, же ихъ*

родичи силовали на супружество. Якъ же мае быти счастье въ такомъ супружествѣ, гдѣ грѣхъ и грѣхъ съ всѣхъ сторонъ!!

Коли отже журитесь, что и якъ зробити, справу цѣлу отдайте тому Сердцу Христа Спасителя, котрое такъ людей полюбило. А Христось поведе, поможе, дасть свѣтло, дасть ласку и все по Божому уложиться.

А ты, господарю, котрый съ сусѣдомъ а може и съ роднымъ братомъ маешь сварню, тай готовъ до процесу прійти, свою справу такожь отдай Христу. Вольно тобѣ о свое право и передъ судомъ упоминатися, але впередъ добре застановися, ци по твоей сторонѣ правда. Щиро помолися, проси Христа о помочь, и роби то, что по довгой молитвѣ совѣсть тобѣ скаже.

Або тогды, коли иде о выборы посла до парламенту або до сойму. Справа дуже важна, свята, христіянское сповненье своихъ горожанскихъ обовязковъ. Але и въ той справѣ, чтобы по Божому была зроблена потреба, по Божому зачати съ молитвою.

Чтобы дальше не напминати всѣ ваши sprawy, кажу вамъ всѣмъ: Коли лишень маєте даяку журбу, бѣду, смутокъ, хоробу, подумайте собѣ, что Богъ добрый на небѣ приславъ намъ Единородного Свого Сына для нашего спасенія. Сынъ Божій Іисусъ Христось, таку мае въ сердцѣ до насъ любовь, что въ каждой и въ найменьшой справѣ можно до Него прибѣгати съ довѣріемъ дѣтей, и что всегда знайдеме у Него теплое, горячо любячое Сердце, повное сповчутя.

Съ такимъ чувствомъ молѣться, дороги родичи, всѣ разомъ вечерню молитву. На конци совѣтую заспѣвати красну пѣснь „Подъ Твою

милость“ або другу въ честь Ісуса Христа.

Най буде по словамъ св. Ап. Павла житє нашихъ фамилій скрите со Христомъ у Богу. (Еф. 3, 3).

Гдѣ у фамиліи всѣ моляться, тамъ вихованье дѣтей поставлено на добрый фундаментъ. Жадна буря страстей, анѣ самъ грѣхъ, анѣ самое пекло не пошкодитъ такимъ дѣтямъ. — Крестъ, что кожного дня отецъ и мати поставляютъ на чоло своихъ дѣтей, на цѣлый свой домъ, хоронить и дѣти и домъ отъ кожного зла.

Славный академикъ французскій Legouvé сказалъ одного разу передъ найвыбранѣйшою публикою у Парижу: „Если бы я малъ выбирати за свои дѣти: або учити Богу молитися або учити ихъ читати, я бы доразъ выбралъ най моя дѣтина учиться перше молитву, бо молитва значить читати найкраснѣйшу и наймудрѣйшу книгу, значить читати съ чола Того, отъ котрого намъ выходитъ кожда свѣтлость, кожда праведность, кожда доброта, кожда ласка“

Дороги родичи !

Учѣть найперше своихъ дѣтей св. молитвы! Молитва вашихъ дѣтей буде зорнѣчка для ихъ и для вашего счастья. Молитва вашихъ дѣтей есть для нихъ и для васъ золотый ключъ небесный. Молитва ваша разомъ съ дѣтьми допровадитъ васъ и ваши дѣти до небесного раю.

II. Христіянска наука и дисциплина у фамиліи.

Кромѣ молитвы мають родичи святой обовязокъ засадити до серця своей дѣтины рослину христіянского вихованя. Ту святу рослину мусять родичи розвивати и управляти съ христіянскою наукою и дисциплиною.

1) Христiянска наука.

Перша христiянска наука мае започати ся уже у фамиліи. Але не лишень започати ю треба у фамиліи, але треба ю и утверджовати, треба ю и розширяти у фамиліи, хотяй дѣти ходять и до школы, и хотяй там мають своего катехиту, котрый их поучуе у катехизму и у Библии. Родичи суть першими отъ Господа опредѣленными учителями св. вѣры. Николи они не можуть быти отрѣшены отъ той службы, або лѣпше сказати отъ сей *чести*.

Въ Старомъ Завѣтѣ Господь Богъ больше разъ розказалъ родичамъ, чтобы поучовали своихъ дѣтей въ законѣ Божомъ. Самъ Господь Богъ такъ промовляе до каждого отца: *„Возвѣсти сыну твоему въ той день... То ми зробилъ Господь, коли я выходилъ изъ Египта“*. (Исхода 13, 8). А коли былъ вже проголошенъ законъ Божій, розказалъ Господь такъ: *„Послухай Ізраиле, Господь Богъ нашъ, Господь единъ есть! Для того люби Господа Бога твоего отъ всего сердца твоего и отъ всей души твоей и всею силою твоею! И най будуть тиі слова, котріи я тобѣ нынѣ розказую въ сердцѣ твоемъ и въ души твоей, и часто съ ними наминай сыновъ твоихъ и говори о нихъ дома сидячи и идучи путемъ и коли лѣгаєшь або встаєєшь“*. (5. Мойс. 6, 4).

Въ Новомъ Завѣтѣ Господь Ісусъ Христосъ установилъ учительску службу для всѣхъ часовъ до конца свѣта. Ту службу мають окончовати епископы и ихъ помочники священники. И они по цѣломъ свѣтѣ нынѣ проповѣдають и навчають науку и вѣру Ісуса Христа. Але съ тымъ

еще христiянски родичи не суть освобождены и розрѣшены отъ своего обовязку поучовати свои дѣти. Св. апостолъ Павелъ хвалить своего ученика Тимоѳея задля его чистой вѣры, котру *научился отъ своей матери*. И св. апостолъ Павелъ въ имя Іисуса Христа заповѣдае родичамъ, чтобы поучовали своихъ дѣтей въ науцѣ и дисциплинѣ христiянской. „Отцы, не раздражайтесь надъ своихъ, но воспитовайте ихъ въ наказаніи и ученіи Господни“. (Ефец. 6, 4).

Заразъ якъ у дѣтинѣ покажутъ ся перши искры розума, коли дѣтина започне довѣдоватися, что та або тамта рѣчь значить, треба, чтобы родичи започали говорити дѣтинѣ о предобромъ Отцѣ на небесахъ, о Іисусѣ Христѣ, о матери Божой, ангелахъ и т. д. Родичи можуть найкрасши науки для своихъ дѣтей брати изъ житя Іисуса Христа. „Цѣлос житя Іисуса Христа есть одна наука моральна“, каже св. Августинъ (De vera Relig. с. 16). Нѣжду, милу, дитинячу любовь до Спасителя най родичи съ дня на день все больше и больше вливають до сердца своихъ дѣтей. Та любовь есть небесный балзамъ, котрый переходитъ черезъ всѣ наши кости и она насъ крѣпитъ и дае намъ житье до послѣднього часа нашего житя. Образъ Христа Спасителя най буде такъ вымальованный у души дѣтины, чтобы его жадна сила на свѣтѣ не могла вытерти изъ ей сердца. Что дитина приняла у першихъ своихъ рокахъ до своего чистого сердца, то познѣйше еще у своей старости побачить на дну своего сердца. И на то буде дивитися якъ на найдорогоцѣннѣйшу памятку изъ своей молодости, якъ на найкрасшій бисеръ своей невинной души.

Послухайте, матери, что каже и пише оденъ

ученый и славный писатель по имени Брентино: „Я бы хотѣлъ написать чтось, что на вѣки зо-стане. И я бы хотѣлъ любить дечто, что есть вѣчно. И для того я пишу одно Имя, и люблю одно Имя, и жию въ одномъ Имени, а то Имя называется *Иисусъ Христосъ*“.

По Иисусу достали дѣти ваши ваше наибольшое добро, богатство ваше. Чтобы они мали съ того цѣлого своего дочасного житя, если бы не достали были по Иисусу Христу житье надприродное?

„*Стажахъ челоѣка Бѣгомъ*“. „Получиламъ чолоѣка по Богу“ сказала Ева, коли уродила першу сою дѣтину. Кожда христіянска мати най такъ скаже и най ту дѣтину, котру ей Господь Богъ дастъ, такъ хоронить и выхове, якъ то Богъ жадае. Добра христіянска мати все зробить, чтобы увидѣти Иисуса вымальованого въ сердцѣ своихъ дѣтей. Она буде говорити своимъ дѣтямъ такъ, якъ говорилъ св. апостоль Павло, першимъ христіянамъ: „*Чадца мой, ѿмѣже пакн вслѣзну, дондеже вѣобразитса Христосъ въ насъ*“. „Дѣтошки мои, котрыхъ я знова съ терпѣньемъ раждаю, поки у васъ *Христосъ не вообразиться*“. (Гал. 4, 18). Добра мати одного дня бере свои дѣти передъ себе и оповѣдае имъ о миломъ Иисусѣ въ Вифлеемѣ. Другій разъ говоритъ имъ якъ хлопчина Иисусъ во Назаретѣ слухалъ матѣрь свою и хранителя св. Іосифа. У великомъ постѣ скаже добрый отецъ своимъ дѣтямъ о мукахъ и терпѣню Иисуса Христа за наши грѣхи. Въ томъ часѣ не забуде отецъ поучити свои дѣти о безконечной любви Иисуса Христа въ найсвятѣйшой Евхаристіи, котру мы принимаеме въ святомъ причастію. — Одного дня отецъ и мати разомъ съ дѣтьми пой-

луть до церкви, чтобы приступити до святой сповѣди и до св. Причастія. О христіянски родичи! Припроваджуйте свои дѣти до Іисуса Христа, бо то Его жаданье! Іисусъ то просить и жадае отъ васъ: „Оставьте дѣтей приходить ко мнѣ и не браните имъ: тацѣхъ бо есть царствіе Божіе“. (Марк. 10, 14.)

А не можете своимъ дѣтямъ говорити о Іисусѣ Христѣ, а не спомнути имъ Его пресвяту, пречисту, преблагословенну Матѣрь? Житѣе Пресвятой Дѣвы Маріи мае въ собѣ всѣ христіянски чесноты. Показуйте, дороги родичи, поодинокимъ чесноты своимъ дѣтямъ на житію матери Божой!

Жива вѣра матери Божой,

Силна надѣя матери Божой,

Найгорячѣйша любовь матери Божой... А яка была въ ней чеснота смиренности, благости, терпеливости, послушности, пильности, вдячности, побожности, святости и т. д. и т. д. Она была всегда такъ свята, всегда повна ласки Божой, всегда въ Богу и съ Богомъ звязанна.

„Вся красна еси“ — цѣла еси красна мати Божа и ей прекрасный образъ такъ легко принимаетъ невинна душа дѣтей. Добри, невинни дѣти наибольше люблять слухати о Бозѣ, о Іисусѣ, о Матери Божой, о Ангелахъ и о Святыхъ. Дитиняча душа голодуе за Богомъ и за Божою наукою. Дитина жадна спознания любви Божой. Погляньте лишень, якъ побожно слухае дитина, коли ей щось оповѣдаете о Бозѣ! Очи горять отъ радости, лице запалене, уста на полъ отворены. То счастье, котрое огортае еѣ душу и сердце, ци то не есть доказомъ, что дѣтина сотворенна и опредѣленна отъ самого Бога на св.

вѣру нашу и на Божіи правды. Каждое питанье и отвѣгъ дѣтины свѣдчить, что она жадае Бога.

2) *Наука Божя и люди сего свѣта.*

Находятъ ся нынѣ многи и премноги люди того свѣта, котры кажутъ, же малымъ дѣтямъ ще не потребно говорити ничего о вѣрѣ и о Бозѣ. Большевики и ихъ компаньоны подъ страшною карою забороняють дѣтямъ говорити о Бозѣ передъ 18. рокомъ, а сами заразъ отъ 7. року поучють дѣтей у своей безбожной науцѣ.

Христіянски родичи! Не слухайте такихъ людей! Духъ того свѣта съ всѣмъ своимъ знаньемъ и съ всѣми изобрѣтеніями еще жадну душу не допровадили до вѣчного щастя и не освободили ей отъ пекла, а премногихъ вже на вѣки запропастили. Сколько разъ подчасъ поучованя катехизму тѣ коротки отвѣты дѣтей силнѣйше вдарили до нашей души, якъ найкрасши отвѣты свѣтскихъ ученыхъ людей! Правды св. вѣры най глубоко будутъ засаждены до невинной души дѣтины, най будутъ дѣтинѣ правымъ свѣтиломъ по всѣхъ дорогахъ житя.

Сотворѣнье свѣта, грѣхъ прародителей нашихъ, смерть Авелова, потопъ свѣта, жертва Аврамова и т. д. то суть правдива исторія, съ котрою треба кормити душу невинной дитины.

Таковымъ способомъ дитина уже заранна въ домѣ родительскомъ выховуеся и поуче въ законѣ Божомъ. И сякъ на дно души дѣтины ставляе ся и за цѣлое его житье запевнѣе ся найдорогоцѣннѣйшее благо св. вѣры. А о томъ мають старатися родичи и тогда, коли ихъ дѣти ходять до школы. Даремный есть трудъ учителей, если ему не помагають родичи!

3) Школы — катехизація.

Старайтесь, отцы и матери, чтобы ваши дѣти порядочно приходили на катехизацію! То важнѣйша работа отъ каждой другой. Спаситель нашъ говорить: „*Кѧмъ, бо польза чловѣкъ, ѡще мїръ всѣхъ прївсѣрѡщѣтъ, а дѡшѣ же скѡю ѡщѣтїтъ: ѡли чтѡ дастъ чловѣкъ ѡзмѣнѣ за дѡшѣ скѡю*“ (Мат. 16, 26). „Что поможетъ чловѣкови, коли весь свѣтъ здобуде, а свою душу занаститъ? Або что дастъ чловѣкъ въ замѣну за свою душу?“

„Жаденъ кусникъ земли, жадна посѣлость“, говоритъ св. Іоаннъ Зл., „не смѣе вамъ быти такъ дорогоцѣнный и милый, якъ ваши дѣти, бо для нихъ на послѣдку збераете всѣ добра. И безумно робить, кто стараетъ ся больше о своихъ посѣлостяхъ и благахъ, якъ о тѣхъ, котрымъ та опредѣлена. Перше отже старанье най для васъ буде старатися о нѣжну душу вашихъ дѣтей и о ихъ успѣхи въ побожности и чесноты! Все другое поставте на другое мѣсто! Бо если будутъ ваши дѣти злы, то имъ не помогутъ ваши гроши; а если будутъ честны и добры, ничего имъ не пошкودитъ убожество“. (Chrys. h. 9. ad Hebr.)

Красно говорить и св. Августинъ:

„Если Христа не познаешь, тогда тебѣ ничего не помагаетъ и если все другое знаешь, але если Христа познаешь, тогда тебѣ другое ничего не шкودитъ, и если всего другого не знаешь“.

4. Христїянска дисциплина.

Христїянска дисциплина має подпомогати науку въ фамилїи. Молода рослина красно принялася и теперь росте и розвиваеся на солнцю Божомъ. Але быстрое око огородника добре ува-

жае на ту молоду рослину; онъ ю очищуе, обрѣзуе. Такъ треба робити и съ малыми дѣтьми. Всьо то, что не дасть дѣтинѣ двигатися горѣ до Бога, треба моцною и способною рукою одорвати, поочищовати, треба острымъ ножемъ христіанской дисциплины одрѣзати.

Чоловѣкъ по своей природѣ склонный на зло. „Се бо въ беззаконіяхъ зачатъ єсмь ѿ въ грѣсѣхъ роди мѧ мати моя“, говоритъ пророкъ Давидъ. Добрый господарь поля не сѣе куколь, але куколь самъ росте разомъ съ пшеницею. Такъ и зло росте само отъ себе съ фундамента нашей души. Той куколь мусять моцнѣ руки родительски заразы съ початку по-вытарговати съ дѣтинячого сердца, чтобы доброе сѣмя могло лѣпше розвиватися. Для того и говоритъ Духъ святой: „Ласкай чадо и оустрашить тѧ, играй съ нимъ и опечалить тѧ, не смѣйся съ нимъ, да не поболѣши о немъ, и на послѣдокъ стиснешь збы твоѧ. Не даждь ємѣ власти въ юности и не презри невѣдѣніѧ єго... славы кыю єго въ юности и сокрѣши ребра єго, дондеже младъ єсть: да не когда шжестѣхъ не покориттисѧ. Накажи сына твоего и дѣлай имъ, да не въ безстѣдїи єгѡ поткнешисѧ“. (Сир. 30, 9—13).

5. Бракъ христіанской дисциплины.

Того христіанского надгляду, той дисциплины якъ и христіанской науки такъ много разъ бракуе по нашихъ фамиліяхъ не лишень убогихъ людей, але не разъ на жаль и священническихъ. О, якъ часто бывае, что око христіанина отца, матери-христіанки, дивиться на дѣти свои окомъ поганина, поганки! И давнѣй-

ше бывало сердце отца и матери переповнено любовію до ихъ дѣтей, але родичи николи не забывали того, что ихъ дѣтина въ грѣху первородномъ зачата и что въ еѣ душѣ находится много недоброго, много склонностей на зло. Та христіянска гадка водила отца и мать у вихованію ихъ дѣтей и они осторожно уважали на свои дѣти, хотяй они были уже и старши, и декотры уже и реверенду носили. Отець и мати не забывали, что они будутъ мусѣти здавати рахунокъ за вихованье своихъ дѣтей всезнаючому Богу и для того безъ кожного жалованя таргали куколь изъ ихъ души и карали, коли было потребно.

Знаю одного батька селянина, правого христіянина, котрый жадалъ цѣлымъ сердцемъ и душею, чтобы его сынъ стался священникомъ. Сынъ малъ на ту службу отъ Бога покликанье. То видѣлъ отецъ. Сынъ былъ принять до института, чтобы приготовитися на богослова и потомъ на священника. Сынъ былъ всегда межи першими учениками въ школѣ. Батько въ душѣ тѣшився съ тымъ, а передъ сыномъ говорилъ: „Богъ тобѣ далъ талантъ. Если ты добре скончилъ школы, то твой обовязокъ. Такъ мае и дальше быти“. Не было ту ниякой обѣцанки, але: „такъ мае быти, Богъ такъ хоче“. Кождого дня на вакаціи той сынъ мусѣлъ ходити до церкви, часто сповѣдатися. По церкви бралъ его отецъ до поля на роботу, чтобы дѣтина не загубилася у товариствахъ вакаційныхъ и не strатила чистоту свою.

Сынъ стался священникомъ. На примиціяхъ ступилъ отецъ першій, чтобы принять благословеніе сына своего священника. Скорше якъ

сынъ поблагословилъ отца, клякнулъ передъ своимъ отцемъ, просилъ о отцовское благословеніе и поцѣловалъ тоты тверды руки отца своего, котры его допровадили передъ олтарь Божій и варовали отъ зла. Отецъ поблагословилъ сына священника, а потомъ онъ просилъ о священническое благословеніе. Коли его досталъ, поцѣловалъ руку слуги Божого — сына своего. Такъ зробила и мати, а такъ и сестры.

* * *

Але загляньме теперь до фамилій нынѣшнихъ часовъ! Не смѣю сказати, что родичи зовсѣмъ не уважають на свои дѣти. О, нѣтъ! Але одно мушу сказати, что многи и премноги родичи то всьо, что ихъ дѣти роблять або уважають за доброе, або похибки и грѣхи своихъ дѣтей скрываютъ и не поправляють. Сколько есть слѣпыхъ матерей, котрѣ и передъ дѣтьми говорятъ, якъ дитина чтось недоброго скаже, або зробить: „А дѣтина якъ дѣтина. Школа уже ю научить розуму“ и т. д. Або: „если будешь дѣтина добра, достанешь такіи и такіи даръ, якого не доставъ анѣ той або той“

Похибки и злы склонности съ дня на день растутъ и скоро изъ нихъ бывають сильны страсти, похоти а и пороки. Та „мамина золота молода головка“ съ часомъ не слухае больше матери, а если и отецъ попустить якъ и мати, то она заповѣдае цѣлой фамиліи. Та „мамина ручочка“, котра якъ мала бѣе свою матѣрь, а мати лишень съ того смѣється, съ часомъ стане *тяжкою рукою*, передъ котрою и тато и няньо будутъ утѣкати. „Ахъ, Боже мой, говоритъ св. Августинъ у своей книзѣ „Confes

siones“, якъ я бѣдный былъ въ дняхъ моей слѣпой молодости! Опустилъ емъ Тебе, о Боже мой, и ишолъ емъ за злыми похотями, а отецъ мой намѣсто того, чтобы мя опоминалъ и каралъ, лишень смѣялся на всѣ мои похибки. Великимъ крокомъ стремилъ емъ ся къ своей гибели, а мой отецъ былъ такъ грозный (жестокій), что на то спокойно дивился, якъ я пропадаю. Онъ ани не рушился, чтобы мя назадъ потягнути. И развратности прозябали и росли въ моей душѣ якъ дурна трава на пренебреженѣомъ полю, а не было дорогой руки, чтобы ту траву повытарговала изъ души моей“

Ци не бывае такъ и въ многихъ христіанскихъ фамиліяхъ, въ котрыхъ дѣтямъ всьо позволяють и гдѣ дѣти добре знаютъ, что свою волю осягнуть лишень съ гнѣвомъ, кричаньемъ и плаканьемъ? Або гдѣ дѣтямъ родичи позволяютъ таковы забавы, котры тяжко безъ грѣха можно позволить и старшимъ. Або гдѣ малымъ дѣтямъ по селахъ и по мѣстахъ позволяютъ родичи сходитися по вечерахъ на „прядки“ або на танцы и т. д., а по мѣстахъ еще и до театру, до кина, на концерты и т. д.?

Або гдѣ дѣвчатко „по поганской безчестной модѣ“ убераеся, а отецъ и мати тымъ тѣшаться и съ потѣхою дивлятся на свое золотое дитя, на свою красну дѣвчину! О, бѣдны такі родичи, але миліонъ миліоновъ разъ еще бѣднѣйши такі дѣти, котрымъ сами ихъ родичи забивають душу!

Дороги мои люди! Братя мои священники! Куда то допроваджуе? Ци то христіанское выхованье, або скорше поганское?

Выхованье безъ христіанской дисциплины

не е жадное вихованье. Дятого и опомінае Духъ Святый и отца и мать: „Не прѣставай мла- дѣнца наказвати: ѿще бо жезломъ бїеши ѣго, не оумретъ (ѿ негѡ).“

Ты побїеши ѣго жезломъ, дѣишъ же ѣгѡ избавиши ѿ смѣрти“ (Притчи. Сол. 23, 13. 14.)

Если отецъ и мати можуть съ любовію и благостію дѣтину на праву дорогу навести и по- правити, тогда най такъ роблять. Але, коли лѣ- бовъ и доброта не помагае, тогда треба брати остро и мудро дѣтину покарати. Если же дѣтина не хоче або не може порозумѣти красного сло- ва, то най порозумѣе бесѣду прута. — Безъ всякого сумнѣву Богъ насъ больше любить, якъ что мы можеме и представить собѣ. Устами Пророка Ісаи (49, 15) посвѣдчуе, Господь ту свою любовь до насъ словами: „Еда забѣдетъ жена ѡтроча скѣе, ...ѿще же ѿ забѣдетъ сїѣхъ жена, но ѿзъ не забѣдѣ тебе“ А ци не виховуе Богъ людей и народы и строгостію якъ и лю- бовію! Ци не маеме досить ясныхъ прикладовъ въ исторіи народа Израилского, якъ Богъ и карами и доказательствомъ своей доброты провадивъ своихъ людей до временного и до вѣчного щастя!

Родичи! Вы Божїи намѣстники. Наслѣдуйте Господа Бога у вихованю своихъ дѣтей! Ваше око най не буде слабое або слѣпое око; най люб- ячи и караючи всегда бдѣе надъ вашими дѣть- ми! Не терпѣть ани найменьшой похибки на своихъ дѣтяхъ! Не пускайте своихъ дѣтей тамъ, гдѣ бы могли себе погубити або затратити! Чимъ раньше зачнѣть приучовати свои дѣти на острый порядокъ, совѣстность и роботу! Лишень робо- тячїй и пильный чоловѣкъ може зостати щасли- вымъ. Лѣнивство допроваджуе до грѣха. Чоло-

вѣкъ есть сотвореный на роботу якъ птичка до лѣтаня, а рыба до плаваня. Кремъ того, такъ выховуйте свои дѣти, чтобы васъ на першее ваше слово послушали. Четверта заповѣдь Божя мае свой особливѣйшій благословѣ Божій. Самъ Іисусъ Христосъ, Бого-Чоловѣкъ былъ послушный. Іисусъ Христосъ въ домѣ Назаретскомъ посвятилъ своею роботою працю и роботу нашу. Приучуйте свои дѣти на то, чтобы наслѣдовали прикладъ Христа Господа! Най растутъ подобно Іисусу Христу не лишень у лѣтахъ але и у мудрости и послушности передъ Богомъ и передъ людьми! Най вамъ будутъ дѣти ваши потѣха ваша не лишень передъ людьми але и передъ Богомъ! Най будутъ дѣти ваши честь нашої св. греко-католической вѣрѣ и нашому руському народу! — А всьо то будете могли осягнути, если будете выхововати свои дѣти у молитвѣ, у христіянской дисциплинѣ и науцѣ, и если имъ послужите добрымъ своимъ прикладомъ.

III. Добрый прикладъ у фамиліи.

Если молода стебелька не е привязанна до одного деревца, то зо вѣтеръ повалить на землю, або переломить. Такъ мусить ся подперити и молода дѣтина моцнымъ коломъ приклада своихъ родичовъ, если хочеме, чтобы щасливо перейшла черезъ бури того свѣта, чтобы ся розквитнула и принесла пожаданы овочи житя своего.

Якъ першій и найвысшій прикладъ далъ Господь Богъ дѣтинѣ прикладъ его родичовъ. Отецъ и мати то суть тіи сотвореня, на котры дѣтина уже изъ природной любви отъ першого дня своего житя найбільше упирае свои очи.

Отець и мати то суть тотъ сильный и моцный
коль, до которого ся ихъ дѣтина придержуе.

Св. Апостоль Павель поставилъ своего
ученика Тита за пастыря и отца першимъ христі-
янамъ на крестѣ. И онъ ему далъ такую науку:

„**Г**о ксѣмъ же сáмъ себѣ подакѣмъ ѿбразъ
дóкрыхъ дѣлъ въ оученіи незакѣстнсе, чѣстность,
нетлѣніе“ (I. Титл. 2, 7).

Якъ добрый прикладъ мають сами себе
подавати всѣ тѣи, котрыхъ Господь Богъ зробилъ
пастырями въ своемъ домѣ надъ одною частію
своего стада. Иисусъ Христосъ самъ насъ учить:

„**Т**акъ да просвѣтитсѣ свѣтъ вашъ предъ
человѣки, ꙗкѣ да видѣтъ двѣра двѣла кáша, и про-
слáвѣтъ ѿ глáкáшего ꙗже на нексѣхъ“ (Мат. 5, 16).

Христіянски родичи! Тѣи слова на першомъ
мѣстѣ вамъ сказаны. Вы перши покликани,
чтобысте были своимъ дѣтямъ свѣтлость и
словомъ и дѣлами на темной дорозѣ сего
свѣта. И сердце дѣтины ничего такъ легко не
принимаетъ до себе, якъ добрый прикладъ отца и
матери. Дѣти отъ природы дуже радо подра-
жають. Дѣтина больше учиться окомъ якъ ухомъ.
Больше и охотнѣйше слухаетъ то, что видитъ, якъ
то, что чуетъ. Стара пословица каже: „Слово
побуждае, прикладъ *потягае* на доброе“ Душа
дѣтины мягка якъ воскъ, и перши впечатлѣнія,
яки принимаетъ и окомъ и ухомъ, рѣшаютъ о цѣлой
будучности дѣтины. Дѣтина, коли вырастетъ, легко
забываетъ и на слова и на предостереженія роди-
човъ, але добрый прикладъ отца и матери ни-
коли не забудетъ! И если дѣтина и тяжше со-
грѣшитъ и зыйдетъ съ правой дороги и глубоко
залѣзе до болота грѣха, образъ добрыхъ родичовъ
не разъ, не дваразъ уже спасетъ чоловѣка отъ най-

страшнѣйшого зла, и припровадивъ его на праву дорогу. О томъ намъ свѣдчить исторія каждого дня.

Но, коли родичи иначе говорятъ, а иначе роблятъ, если ихъ житье не подтвержуетъ ихъ науку, ци можуть тогда и найкрасши предостереженя зацѣпитися до сердца дѣтины? Если житье родичовъ переповненное злобою и неправдою, если ихъ дѣти часто видятъ ихъ въ всякихъ слабостяхъ и грѣхахъ, або въ пїянствѣ, если много разъ чуютъ вражду, проклоны, ненависть, ложь, очерненя, обманы... ци не пойдутъ и дѣти такою дорогою? Ой пойдутъ, пойдутъ и дѣти еще до большого зла. Або, если родичи совѣтуютъ своимъ дѣтямъ молитву и напоминають ихъ на страхъ Божій и на доброе житье, чого зроблять ти красны слова въ сердцахъ дѣтей, если дѣти николи не видятъ своего отца або свою мать, чтобы Богу помолилися? Если дѣти видятъ, (а они звычайно дуже добре видятъ, якъ ихъ родичи живутъ), же ихъ родичи рѣдко ходять до церкви, же не слухають проповѣдей, же рѣдко сповѣдаються, рѣдко приступають до св. Причастія; если дѣти видятъ або и слухають, же ихъ родичи слабой або нѣякой вѣры не мають; якъ тогда родичи годны добре выховати своихъ дѣтей?

Если таки родичи чось и противорѣчатъ своей дѣтинѣ задля даякой похибки, ихъ злый прикладъ больше зробишь, якъ найкрасшое ихъ упомненье.

Приклады, яки намъ дае самъ Духъ Святый.

Вамъ, добры матери, най всегда служить якъ прикладъ славна мати Макавейска. Безбож-

ный царь Антиохъ розказалъ зловити ту жену и ей 7 сыновъ задля того, бо они трималися закона Божого и не хотѣли отречися вѣры въ Господа Бога: „бичами и жилами воловыми ихъ бичовали, скуру имъ съ тѣла дерли, языки вытяговали, край удовъ тѣлесныхъ отсѣкали, на распаленомъ желѣзѣ ихъ пекли и на конци животъ имъ отбєрали. Предивна мати видѣла смерть всѣхъ своихъ 7 сыновъ, своимъ прикладомъ и словами ихъ ободряла. „Не бойтєся того, котрый таргаетъ тѣлєса ваша“ говорила своимъ дѣтямъ, „воспріимите смерть, да въ милости... воспріиму васъ“. (II. Макав. гл. 7.) „Послѣди сыновъ и мати скончалася“, пише св. Письмо.— Будьте и Вы всѣ всегда житємъ своимъ отверта книга для дѣтей своихъ.

Всѣмъ *отцамъ* якъ прикладъ предкладаю великого Елеазара (II. Макав. 6 гл.) котрый такъ говорилъ и дѣлалъ:

„Не бо возрасту нашему достойно есть лицемѣрити, да многи отъ юныхъ непщующе Елеазара девятидесятилѣтна прейти къ жительству иноплеменныхъ, и они моего ради лицемѣрія и маловременнаго живота прелстятся мене ради. Аще бо нынѣшнія муки чєловѣческія и избавлюся, но руки всемогущаго ни живо ни умерый избѣгу. Юнымъ же образъ доблій оставлю, еже усердно и доблєственнє за честныя и свѣтыя законы умирати...“ И померъ за св. вѣру.

Молодымъ *хлопцямъ* якъ прикладъ предлагаю Іосифа Египетскаго, котрый радше пошолъ до темници, якъ зрєбити зло „передъ очами всевидячєго Бога“.

Дѣвкамъ якъ прикладъ подаваю славну дѣвицу Юдиту, котра своєю чистотою и побожностію побѣдила вороговъ своего народа.

Всѣмъ, а понайперше священническимъ фамиліямъ; ставлю якъ прикладъ найсвятѣйшу фамилію нового завѣта. По прикладу Матери Божой и св. Іосифа провадьте свои фамиліи: много молѣться, терпеливо зносите свои кресты, любите убожество и понадъ всею любовью Господа Бога и его святу Церковь, приступайте каждого дня до св. Причастія. — Лишень жива св. вѣра охоронить нашъ народъ отъ пропасти.

Не думаю вычисляти зла, до якихъ допроваджують злѣ приклады родителей. Року 1910. у Франціи въ Esles-и жила одна богата фамилія, котра думала, же для нихъ непотребна вѣра въ Бога, и ихъ дѣтямъ непотребна наука у святой вѣрѣ, бо они мають досить грошей. Дѣти росли въ домѣ такъ якъ „дубъ росте въ лѣсѣ“ безъ вѣры. Коли священникъ опоминалъ отца и матѣрь най посилають дѣтей на катихизацію, отвѣчали, же „дубъ росте безъ вѣры, можуть рости и ихъ дѣти“. Двадцять лѣтъ минуло, а найстарший сынъ былъ осужденый на смерть задля того, бо забилъ мать свою, котра му не хотѣла давати только грошей, сколько онъ потребовалъ на распустное житѣе. Такимъ плодомъ кончилась наука и прикладъ безбожныхъ родителей. А сколько есть такихъ фамилій!

Дорогіи мои отцы и матери! Еще разъ вамъ кажу: уважайте на христіянское вихованье своихъ дѣтей больше, якъ на свои очи!

Коли царь Юліанъ апостатъ хотѣлъ назадъ запровадити поганство на мѣсто христіянства, всѣ его стараня не удавалися. Имѣлъ онъ одного мудрого учителя поганина за 'совѣтника, котрому имя было Либаній. Сей чоловікъ старался вынайти причину, для чого то неможно назадъ

запровадити поганство. И вынайшолъ. А знаете, кто тому найбільше опирався? Най скаже самъ поганинъ Либаній. „Причина тому стоить въ христіянскихъ женахъ. О, яки то чудесны жены тѣ христіянки!“ Юліянъ померъ страшною смертію а христіянство 15 столѣтій по немъ еще жіє. Ставають и днесь новы Юліяны Апостаты. Они хотять и у насъ запровадити кннгами, модою, забавами, силою и всѣми можливими способами модерное поганство. Нашъ подкарпатско-руській народъ зостане грекокатолическимъ, если будуть мусѣти Юліяны и Либаніи нынѣшнього вѣка сказати: „О, яки то дѣвчата, яки то жены, яки то матери, тіи грекокатолически Русинки!“

Подкарпатскій руській народъ захоронять, якъ грекокатолическій народъ попри его священство, горячи грекокатолически руськи матери, ревны грекокатолически руськи супруги и неустрашими грекокатолически руськи дѣвчата.

Най Всевышній Богъ благословить всѣхъ Васъ, а и мене недостойного, чтобы мы чимъ разъ больше умѣли трудитися для Его славы, для добра нашего руського народа и для спасенія душъ нашихъ.

Благодать Господа нашего Іисуса Христа и любви Бога (и отца) и общеніє святаго Духа съ всѣми вами. (II. Кор. 13, 13).

Въ Пряшовѣ въ недѣлю Мытаря и фарисея 1924.

*) Сіє Посланіє най оо. духовники вмѣсто проповѣди перечитають у церкви въ чотырохъ недѣляхъ послѣ Пасхи.